

Majorrek biltzeko deia egin die Ipar Irlandako alderdi nagusiei

Hamazazpi urtez lehen ministro bat alderdi irlandarrekin biltzen den lehenengo aldia da

John Majorrek, Erresuma Batuko lehen ministroak zuzen zuzenean konpromezua hartu du Ipar Irlandako baketze prozesuan. Atzo bertan lau alderdi politiko 'demokratiko' nagusietako buruzagiei dei egin zien datorren astean Downing Streeteko 10. zenbakian berarekin biltzeko. Hamazazpi urte luzetan ez da horrelakorik egin.

LONDRES

Oraindik ez da egun zehatzik jarri, baina datorren astean izango da bilera hori. Hau izan daiteke Mendebaldeko Europako azken urteotako eskualderik biolentoenaren baketzerako azken txanpa. Majorren jarrera Ipar Irlandako biolentziari amaiera emateko lehen ministro britainiarren erabakiak hartzeko gaitasunaren adibidetzat hartu izan da giro politikoan. Iazko urtean 97 lagun hil ziren atentatu eta enfrontamendu desberdinetan eta aurtun, berriz, kopuru hori gainditu egin daiteke, urte hasieratik gaur arte 26 lagun hil bait dira biolentziaren eraginez.

Majorrek Ulsterreko Alderdi Unionista (UUP), Ulsterreko Alderdi Demokratikoa (UDP), Alderdi Sozialdemokrata Liberala (SDLP) eta Aliantza alderdiak deitu ditu berarekin biltzeko, justu komunitate katoliko eta protestanteen arteko enfrontamenduak gogortzen hasi direnean.

Major 'gizon zintzoaren' eginkizuna betetzera bultzatu duen beste faktorea Peter Brooke Ipar Irlandarako ministro britainiarrak proposa-



Belfasteko azken atentatuek bultzatu dute Major horrelako erabakia hartzera.

turiko bake plangintza erabat geldituta egotea izan da. Brookeren bake plangintza bertan behera utzi zuten alderdiek iragan urteko udan, hiru fasez osatuta zegoen negoziaketa

prozesuaren lehendabiziko fasean. Soilik asmoen azalpen hutsean geratu zen Ipar Irlandari balizko autonomia eta Legebiltzarra ematea. Hurrengo bi faseak ziren, alde batetik

IRaren iragarpena

Irlandako Armada Errepublikarrak (IRA), Irlanda errepublikari Ipar Irlandan batzeko borroka egiten duen talde armatuak herenegun gauean kaleratutako komunikatu batean adierazi zuen ez duela inolako ekintza biolentorik egingo, asteazkeneko talde loyalistek Belfastko auzo katoliko batean egindako hilketaren ostean. Komunikatu honekin Ipar Irlandako hierarkia katolikoek eginiko deiari erantzun dio IRAk. Dublinetik egindako iragarpenean, IRAko buruzagitza adierazi du katoliko eta protestanteen arteko biolentziarekin eten egin behar dela. Hala ere, komunikatu horretan argi utzi du Segurtasun Indar eta Polizia britainiarraren aurkako erasoek segituko dutela.

IRaren iragarpen honen arabera, iragan Eguberri egunetan Londreseko denda kateetan burutako atentatuak egiteari utziko diola iragarri du IRAk, Ipar Irlandako sektore batzuek IRAko buruzagitza benetako agintea zalantzan jarri badute ere.

Ipar Irlandako alderdi politikoak Irlanda Errepublikako agintariekin elkarriketatzea eta hurrena, berriz, Dublin eta Londresen arteko elkarriketei ekitea.

1976an, eta Harold Wilson labortaren ekimenez, orduan bera bait zen Erresuma Batuko lehen ministroa, bildu ziren Downing Streeten orain John Majorrekin bilduko diren pertsona berak, Jean Molineaux (UUP), Ian Pailey apaiza (UDP), John Hume (SDLP) eta John Alderdice (Aliantza) hain zuzen. Lau buruzagi horiek esperantza handiak jarri dituzte zita honetan.

Emaiza onak lor ditzake oposizioak bihar Errumaniako hauteskundeetan

BUCURESTI

Errumanian bihar egingo diren udal hauteskundeetan Salbazio Fronte Nazionalako komunista ohiek nagusitasuna gal dezakete, batez ere hiri nagusietan. Inkestek ziurtzat eman dute Bucuresti eta gaitz nontzeko hiri nagusietan alkatetzak Konbentzio Demokratikoa oposizioko alderdi nagusiaren eskuetara pasako direla. Konbentzio Demokratikoaren barne, oposizio errumaniarreko hamalu alderdi nagusiak daude.

Inkesta guztiek iragarri dute Bucurestiko Udalean Konbentzio Demokratikoko hautagaiak aurre hartuko diola Salbazio Frontekoari. 'Liberitatea' egunkariak eskatutako inkestak dioenez, Crin Halaicu oposizioko alkategaiak botoen % 26 eskuratuko ditu Bucurestin. Cazimir Ionescu komunista ohiak, berriz, botoen % 20 baino gehiago ez ditu lortuko. Dena den, Errumaniako Kazetarien Elkartek enkargatutako inkesta batek, Halaicu eta Ionescuren arteko tarte askoz handiagoa izango dela iragarri du. Azken inkesta honen arabera, Halaicuk botoen % 50 eskuratuko litzuke eta Ionescuk, soilik, % 20.

Udal hauteskunde hauetara laurogeitalau alderdi politiko aurkeztu dira eta 140.000 alkategai lehian ibiliko dira 2.961 udaletako buruzagitza eskuratzeko.

Shamir: «Israel ez dago behartuta Camp Davideko akordioa betetzera»

JERUSALEM

Yitzhak Shamir Israeleko lehen ministroak, bere Gobernuak Camp David-eko hitzarmenaren agintzen den guztia ez duela bete beharrik adierazi zuen. Camp Davideko akordioak 1978. urtean sinatu ziren eta gaur egun Israel eta arabiarrek egiten ari diren negoziaketen oinarria dira. Akordio hauei esker Israel eta Egiptok 1979. urtean bakea sinatu eta berrogei urte iraun zuen bi estatuen arteko gatazkari amaiera eman zioten.

Shamir garai hartan Israeleko Legebiltzarreko lehendakaria zen eta akordioak sinatzeari uko egin zion, palestinarrek egin zuten moduan. Gaur egun, hamalau urte geroago, Shamirren jarrera ezer gutxi aldatu da. Camp Davideko akordioaren bidez lurralde okupatutako palestinarrei bost urtetako autonomia eskaintzen

✓ Shamirren jokaera, datorren ekainean Israelen egingo diren hauteskundeetara begira hartu duen jarreraren gogorraren testiguan kokatu behar da.

zitzaien. Epe hori agortu aurretik, hirugarren urtean, palestinar eta israeldarrek behin-betiko irtenbidea negoziatu beharko lukete.

Shamirren ustez, Israel ez dago behartuta Camp Davideko akordioetan esandako guztia betetzera. «Denborak aurrera egin eta gauzak asko aldatu dira» zioen lehen ministro israeldarrek, eta lurralde okupatuetan 1978. urtean soilik 15.000 kolono bizi zirela gogoratu zuen. Gaur,

berriz, ehun mila dira Gazzah eta Zisjordanian bizi diren juduak.

SHAMIR HAUTESKUNDEI BEGIRA

Israelen ekainean hauteskundeak egingo dira eta lehen ministroak bere ohizko jarrera, hau da, palestinarren eskubide guztiak ukatzeko joera berpiztu du. Shamirrek bere jarraitzailei sendotasun itxura eman nahi die, amore eman gabe negoziatzeko gai den politikaria dela frogatu nahi du. Palestinarrek, Shamirren ustez, «negoziatioetan soilik emaitza onak lortzeaz arduratu beharko lirateke eta gustora egin daitezke lortu ahal den gutxiena eskuratzen badute ere». Ashrawi bozeramale palestinarrek, berriz, palestinarrek lurralde okupatuetan bere Estatu independentea osatu nahi dutela garbi utzi du. Alde bien jarrerak, ez dira gehiegi hurbildu.



LIZARTZAKO UDALA

IRAGARKIA

1991ko uztailaren 23ko datuz, Lizartzako Udalaren Bilkura osoak, behin-betirako onartutako Okupatu beharrendaren Akordioaren bidez 3. Areako Ejekuziorako eta Iturri-Aurre eta bere jabetzako lurrei dagokien ondasun eta eskubideen zerrenda zehatza onartu zuen.

Desjabetzaren espediente honetan, Euskal Herriko Autonomi Elkarteko Gobernu Kontseiluak, Autonomi Estatutuaren 11-1 Artikuluan dioenari jarraituz, 1991ko Abenduaren 17ko 704/91 zenbakia duen Dekretuaren bidez, goian aipatutako ondasun eta eskubideen Okupaziorako Presazko Aitorpena erabaki zuen. Guzti hau 1992ko Urtarrilaren 16ko 10 zenbakiko Euskal Herriko Aldizkaritzaren Aldizkarian argitaratua.

Hori dela eta, Lizartzako Udalak, indarrean dagoen beharrezko Desjabetzapenerako Legeak 85. Artikuluan onartzen dizkion eskurantzak alde batetik, eta bestetik Lege berberaren 52. Artikuluan, eta bere Arautegiko 56 eta hurrengo artikuluetan dioenari jarraituz, aipatutako ondasun eta eskubideen Okupazio aurretiko Aktak jasotzea erabaki du. Hau, datorren 1992ko Martxoaren 23an, goizeko 12etan egingo da.

Interesatuta dauden tituludunak, Okupatu diren lurretan aurkeztuko dira, goian esandako egun eta orduetan.

Aipatutako egintzara, gaiak ukitzen dituzten pertsonak eta ukitutako ondasunengan interesak edo edozein eskubide duten tituludunak pertsonalki azaldu beharko dute, edo legeak dioenaren arabera, beren izenean jokatzeak lege onartutako pertsonaren batek ordezkatuta, Ezagutza Nortasun Agiria, titularen jabe direla adierazten duten agiriak edo kontribuzioaren azken ordainagiria eta egokiak ikusten dituen agiri guztiak eramanez, eta gogokoa balute, beren Peritua, Abokatua edota Notario baten laguntza eraman dezakete, azken hauek beren kontura.

Lizartza, 1992ko urtarrilaren 31n. ALKATEA